

TEZAUUR LITURGIC
10 IANUARIE

ACATISTUL
SF. IERARH-MUCENIC
ANATOLIE
GRISIUK,
MITROPOLITUL
ODESSEI

I



MOSCOVA, 2000



Акафист священномученику Анатолию, митрополиту Одесскому

Кондак 1

Избранный угодниче Христов и премудрый архипастырю, в святости стадо Христово хранивший, священномучениче Анатолие, восхваляя дивное житие твое, смиренно молим тя: моли о нас Человеколюбца Господа, да помилует нас, ищущих твоего за нас к Нему предстательства и зовущих ти: Радуйся, священномучениче Анатолие, Архиерею Небесному верно послуживший.

Икос 1

Ангелом небесным уподобился еси, святителю Анатолие, егда от младых лет, духовную науку постигая, во иночестве послужити Богу возжелал еси. Мы же, воспевая ангельскую чистоту твою, вопием ти сице:

Радуйся, светом Христовым во святом крещении просвещенный.

Радуйся, в честь святого Апостола Господня Андреем нареченный.

Радуйся, материю твоею благочестию наученный.

Радуйся, со Христовою Церковью навеки обрученный.

Радуйся, в разуме Богом просвещенный и умудренный.

Радуйся, в вере Православней сердцем и душою утвержденный.

Радуйся, священномучениче Анатолие, Архиерею Небесному верно послуживший.

Кондак 2

Видя Господь непорочное житие твое, плотскими страстями не омраченное, сподобил тя, священномучениче Христов, принятия ангельского образа. Ты же, с ревностию монашеския обеты исполняя, Богу воспевал еси непрестанно хвалу: Аллилуиа.

Икос 2

Разум чист душою восприняти сподобился еси, богомудре Анатолие, в богословских трудах преуспевая. Мы же, восхваляя вся, яже ко прославлению Господа подъял еси, воспеваем тебе сице:

Радуйся, измлада смирения и молчания хранителю.

Радуйся, заповедей Божиих усердный исполнителю.

Радуйся, молитвы и воздержания ревнителю.

Радуйся, спастися желающим мудрый учителю.

Радуйся, человеческого суемудрия и неправды обличителю.

Радуйся, веры Православных неустанный насадителю.

Радуйся, священномучениче Анатолие, Архиеерею Небесному верно послуживший.

Кондак 3

Силою свыше облече тя Дух Святой, егда пастве Казанстей во епископа поставляем был еси. Ты же, яко добрый пастырь, словесныя овцы во дворы Господни приводя, укрепляющему тя Иисусу воспевал еси: Аллилуиа.

Икос 3

Имеяй в сердце своем свет Христов, угодниче Божий, сошедый на тя в чудном явлении, ревностно хранил еси его во всем житии твоём.

Темже и претерпел еси до конца вся скорби и гонения, кротостию и смирением своими Христу уподобляясь. Мы же, взирая на добродетели твоя, восхваляем тя тако:

Радуйся, сосуде Божественного избрания.

Радуйся, плод зрелый добраго воспитания.

Радуйся, не уклонивыйся от Господнего призывания.

Радуйся, не посрамляющий нашего на Него упования.

Радуйся, не отвергающий нашего воздыхания.

Радуйся, исполненный райскаго благоухания.

Радуйся, священномучениче Анатолие, Архиеерею Небесному верно послуживший.

Кондак 4

Бурею христоубийства дышуще, воздвигоша гонение на Церковь Божию лютии безбожницы. Ты же, исповедниче Христов, не убоялся еси прещения их, но всегда готов был еси за веру Православную пострадати, воспевая Господеви: Аллилуиа.

Икос 4

Слышавше православнии людие о ревностном служении твоем Церкви Христовой, притекаху к тебе в нуждах и скорбех, отеческаго наставления твоего ищуще. Ты же с любовью всех приемля, поучал еси верность Христу хранить и все упование на Бога возлагати. Мы же, вспоминая сие, тако вопием ти:

Радуйся, образе служения неленостнаго.

Радуйся, всею душою взыскавый Царствия Небеснаго.

Радуйся, чадом твоим спасения подателю.

Радуйся, истины утвердителю.

Радуйся, неправды обличителю.

Радуйся, заблудших вразумителю.

Радуйся, священномучениче Анатолие, Архиеерею Небесному верно послуживший.

Кондак 5

Боготечная звезда Православныя веры был еси, священномучениче Анатолие, указующая пастве твоей единый надежный путь ко спасению, да

все единым сердцем и едиными устами взывают спасающему Богу: Аллилуиа.

Икос 5

Видя в тебе непоколебимую веру и мужество, боголюбиве Анатолие, яко и во узах темничных не преставаеши о пастве твоей пещися, восхваляем Бога, даровавшего ти крепость и силу и тебе, угоднику Его, тако взываем:

Радуйся, единого Христа всем сердцем возлюбивый.

Радуйся, верность Ему до конца сохранивый.

Радуйся, душу свою Пастырю Небесному всецело покоривый.

Радуйся, венец из руку Творца на небеси получивый.

Радуйся, собою образ пастыря достойного явивый.

Радуйся, яко бесплотный ангел житие свое поживый.

Радуйся, священномучениче Анатолие, Архидиакону Небесному верно послуживший.

Кондак 6

Проповедником истины Христовы явился еси, славный священномучениче Анатолие, егда не терпящая безбоязненнаго служения твоего богоборцы во узы тя заключаху. Ты же, на Господа все свое упование возложив, сладко воспевал еси Ему: Аллилуиа.

Икос 6

Возсиял еси, святителю Анатолие, яко светильник, светяй на свещнице истинныя веры Христовы, высотой ума твоего озаряя души верных и разгоняя тьму нечестия и неверия. Сего ради притекаху к тебе яко к истинному отцу и наставнику вси житейскими бурями колеблемии и, помощь от тебе получивше, тако ублажаху тя:

Радуйся, воли Божией всецело себе предававый.

Радуйся, богомыслием уныние неленостно отревавый.

Радуйся, помыслы плотския молитвою прогонявый.

Радуйся, чадом духовным всепрощения у Господа умолявый.

Радуйся, козни богомерзския присно побеждавый.

Радуйся, нетленное наследие в души своей стяжавый.

Радуйся, священномучениче Анатолие, Архиерею Небесному верно послуживший.

Кондак 7

Хотяй стадо Христово целым и невредимым к пажитям небесным привести, святителю Анатолие, велие попечение о Церкви имел еси, от раскола и ересей верных ея сохраняя и Христу во вся дни воспевая: Аллилуиа.

Икос 7

Дивное показал еси долготерпение, священномучениче Анатолие, Христову долготерпению подражая, егда в годину тяжких испытаний паству твою окормлял еси, будучи ей щитом и оградою от всякия напасти вражия. Людие же, умиленно на тя взирающе, душами умиротворяся, во благом уповании на Бога укрепляхуся. Мы же, притекая к тебе, воздаем ти похвалы сия:

Радуйся, яко путь в Царствие Небесное обрел еси.

Радуйся, яко сим путем невозвратно шествовал еси.

Радуйся, яко небесная паче земнаго возлюбил еси.

Радуйся, яко Ангелом житием своим уподобился еси.

Радуйся, яко Господа чистым сердцем зрети сподобился еси.

Радуйся, яко Пресвятей Троице с благоговением поклоняться всех научал еси.

Радуйся, священномучениче Анатолие, Архиерею Небесному верно послуживший.

Кондак 8

Странно бысть маловерным и малодушным зрети, святителю отче Анатолие, како в лютых гонениях праведное житие провождая, утверждал еси слабеющих в вере, укреплял еси немощных духом, призывал еси к терпению во исповедывании Христове, поминая слова Спасителя: «Не бойтесь убивающих тело, души же не могущих убить», воспевая купно с ними: Аллилуиа.

Икос 8

Весь был еси в Бозе богомыслием и, укрепляемый Божией благодатию, неприступен явился еси коварному врагу, ищущему погибели всякой душе человечесей. Руководи убо и нас непреткновенно ходити путем заповедей Христовых, да вопием ти:

Радуйся, страже Церкви Христовы неустрашимый.

Радуйся, исполнителю заповедей Его неутомимый.

Радуйся, за Господа неверными гонимый.

Радуйся, Спасителем на всех путех хранимый.

Радуйся, Пречистою Девой выну покрываемый.

Радуйся, Ангелами и святыми на небесах приятый.

Радуйся, священномучениче Анатолие, Архиерею Небесному верно послуживший.

Кондак 9

Вси видящии тя, святителю Христов Анатолие, зело дивляхуся твоему непоколебимому стоянию за веру истинную, заветы бо отеческия

соблюдая, не токмо не страшился еси уз и прещений, но мужественно вся сия за Христа терпя, и иных научал еси мужественно подвизатися за веру Православную, непрестанно поя: Аллилуиа.

Икос 9

Ветии многовещаннии не возмогут по достоянию восхвалити вся страдания твоя, за Христа и Церковь Его Святую претерпенныя. Мы же, мужество твое поминая и скорби твоя сердечныя убажая, умиленно поем сице:

Радуйся, яко в райских обителех ныне пребываеши.

Радуйся, яко с высоты небесныя на нас призираеши.

Радуйся, яко своим заступлением нам помогаеши.

Радуйся, яко твоими молитвами милость Божию на ны изливаеши.

Радуйся, яко своим предстательством от бед ны избавляеши.

Радуйся, яко плачущих и страждущих с любовию утешаеши.

Радуйся, священномучениче Анатолие,
Архиерею Небесному верно послуживший.

Кондак 10

Спасти хотяй души многия от погибели вечныя,
непрестанно слово Божие проповедал еси,
святителю богомудре, твердыми быти в вере
научая и от Церкви Божией в години бедствий
и гонений не отпадая. И тако привел еси к
отечеству Небесному многия, жаждущия жизни
вечныя, ныне же поющия Богу: Аллилуиа.

Икос 10

Стеною твердою и крепкою оградою пастве
твоей явился еси, святителю Христов Анатолие,
богомудрым водительство Церковь и словесныя
овцы стада Христова сохраняя. И ныне светом
Божественныя мудрости твоея тьму неверия
отжени от нас, да тобою просвещаемы, вопием
сице:

Радуйся, яко тобою Церковь Божия
благоукрашается.

Радуйся, яко тобою вера Христова
утверждается.

Радуйся, яко тобою край наш просвещается.

Радуйся, яко тобою мир во языцех укрепляется.

Радуйся, яко тобою души наша услаждаются.

Радуйся, яко тобою милость с небесе
ниспосылается.

Радуйся, священномучениче Анатолие,
Архиерею Небесному верно послуживший.

Кондак 11

Пение умиленное приносим ти, святителю отче
Анатолие, прославляюще твоя за Христа
страдания и молим тя: испроси нам у Господа
нашего Иисуса Христа выну в Православии
пребывати, козней лукаваго избегати и с тобою
купно воспевати: Аллилуиа.

Икос 11

Со светлым и радостным лицом последовал еси
на страдания, уготованныя ти от мучителей,
священномучениче Анатолие, и вся безропотно
претерпевая до конца верен Христу пребыл еси.
Мы же, вспоминая мученическую кончину
твою, со умилением зовем ти:

Радуйся, края Таврическаго немеркнущая славо
и украшение.

Радуйся, градов наших крепкая защита и ограждение.

Радуйся, паствы твоея от бед избавление.

Радуйся, путей неправедных истинное исправление.

Радуйся, веры Православныя в земли нашей утверждение.

Радуйся, сирых и обездоленных покров и защищение.

Радуйся, священномучениче Анатолие, Архиеерею Небесному верно послуживший.

Кондак 12

Благодать свыше ти данную познавше, отче наш Анатолие, тебе, нашего милостиваго отца, прилежно просим: пролей ныне теплую твою молитву о нас, грешных, ко Господу, яко да укрепит Церковь Свою Святую, от распрей и расколов незыблему да сохранит, и вся православныя христианы в мире и благоденствии соблюдет, да купно вси воспеваем: Аллилуиа.

Икос 12

Поюще твое прославление, ублажаем тя, священномучениче Анатолие, и, вспоминая страдальческую кончину твою, тако в похвалу вопием ти:

Радуйся, всем с верою приходящим токи чудес изливаяй.

Радуйся, лишенным смысла ум здравый подаваяй.

Радуйся, в сонних и видениях помощь твою являяй.

Радуйся, светом истины Христовы нас озаряяй.

Радуйся, Божественною любовью души наша согреваяй.

Радуйся, страну нашу православную от бед и напастей ограждаяй.

Радуйся, священномучениче Анатолие, Архиеерею Небесному верно послуживший.

Кондак 13

О святителю дивный, архипастырю Божий Анатолие, прими ныне приносимое нами тебе моление, и испроси у всеблагаго Бога нашего

даровати миру умирение и душам нашим спасение да во Царствии Небеснем выну воспеваем: Аллилуиа.

[Этот кондак читается трижды, затем икос 1 и кондак 1).

